

Til  
PEFC-Norge

Brandal 10.juni 2022.

## UTTALE TIL NORSK PEFC SKOGSTANDARD

Vi syner til høyringsbrev av 11.04.2022 og nyttar høvet til ein liten uttale.

Utkastet tek sterke omsyn til miljøaspektet, og det er viktig. Men omsynet til økonomi og sosiale forhold kjem svakare fram. Det er svært ubalansert når vi kjenner til kva tidsnære miljøendringane vil medføre for oss. Fossile råstoffkjelder må fasast ut til fordel for dei fornybare kjeldene. Vi treng derfor handlingsrom utan for mange unødvendige avgrensingar. Tilgangen til bruk av ulike treslag er døme på handlingsrom.

### Kravpunkt 8 og skogproduksjon

Vi har bak oss ei lang periode med skogreising og auka skogproduksjon. Men landskogtakseringa syner no at tilveksten går ned. Det er alvorleg for eit slikt fornybart råstoff. Dette treng sterkare fokus fordi vi kan auke produksjonen i lang tid enno gjennom langsiktig og god skogforvaltning. Skogbruket har kunnskap om god skogforvaltning og høg verdiskaping, men her er det enno ein jobb å gjere ved betre forynging og ungskogpleie. Men like viktig er vern om produksjonsareala så dei ikkje utgår gjennom nedbygging og unødvendige restriksjonar.

### Kravpunkt 20 – utanlandske treslag

Fleire utanlandske treslag har funne ein plass i norsk skogbruk. Årsaka er sjølvstekt at desse treslaga har særeigne eigenskapar når det gjeld kvalitet, volumproduksjon og CO<sub>2</sub>-opptak. Dei utanlandske treslaga vil ikkje dominere norsk skogbruk, men dei vil vere eit viktig supplement. Derfor er forslaget lite fornuftig og har for sterke avgrensingar i bruk av utanlandske treslag.

### Kravpunkt 21 – Påskoging/avskoging

Den store hogsten og avskoginga er av høgverdig produksjonsskog. Dette er skog i god vokster med høgt CO<sub>2</sub>-opptak. Det vi observerer av attgroing er i hovudsak lauv og krattskog med låg produksjon, CO<sub>2</sub>-opptak og kvalitet. Areal avskoging og areal attgroing kan såleis ikkje samanliknast på nokon måte. Attgroinga tek lang tid og gjev ikkje reelt bidrag til det grøne skiftet i vår tid. Skogbruket kan gje store og viktige bidrag til det grøne skiftet ved målretta forynging, påskoging og val av gode treslag.


### Kravpunkt 24 – omsyn til rovfuglar

I Møre og Romsdal er hønsehauk ein vanleg rovfugl. Vi er sjølvstekt klar over at ein god del ungfugl frå indre deler av landet overvintrar ved kysten. Men vi har solide hekkebestandar både på fastlandet og i plantefelt på øyane. Vi ser ikkje noko rimeleg argument for utviding av omsynssoner for hønsehaukreir. Også viktig å notere seg at hønsehauken har evne til å bygge nye reir og at dei kan ta i bruk nye kråkereir.



Når det gjeld havørn har den i stor grad erobra dei gamle revira den hadde frå gamalt av i vårt fylke. Lokalitetane er fylte opp etter næringstilgangen av i dag. Dette inneber at havørna er attende til skoglokalitetane som den måtte forlate den tida reir vart plyndra og ørna vart jakta på. Etter vår røynsle har ørna stor toleranse for folk og ferdsle. Hekkande par bygger først reir etter å ha utforska området eit par år. Dei finn seg stader der dei kjenner mønster for ferdsel og der dei kjenner seg trygge. Dette kan vere ganske tett på både bustad og ferdsel. Om det likevel skulle skje noko irregulært eller uventa forstyrring er det viktig å ha klart for seg at vi har ein sterk bestand der lokalitetane er fylte opp. Dette er også truleg årsaka til at styresmaktene tek ganske lett på alle ørnene som går i vindturbinane. Konklusjonen er at vi ikkje ser gode argument for at skogbruket skal verte pålagde strenge restriksjonar med omsyn til havørn.

Med helsing  
for Møre og Romsdal skognæringsforum

  
Håkon Johan Eliassen  
styreleiar